

序

孔夫子能言夏殷之禮而杞宋之文獻不足則不能徵之以堂堂國家之禮大聖人之能言而猶尙如此况下代一家之文獻豈可無徵而信之乎吾柳之文獻代有所述而其初則合編於世譜總目而太畧矣中則稍加詳矣而猶有未備處識者病之今因忠景公派譜之役間取而櫛栝舊編則載於世代之下散見錯出難於放覽今則各立部門分類第次正其誤謬補其遺漏各註出處明確有據顏之以文獻昭鑑此皆都有司寅鳳用年歲之功遍攷諸書整釐極精始可徵信於是乎吾家之文獻展無不足之歎而世有能言之君子或當取而徵之矣余以無似忝在役末諸族屬以弁卷窃自幸其與聞而輒敢抗顏泚筆叙之如此云
庚子三月上巳忠景公十七代孫根鮮謹序

跋

嗚呼此文獻昭鑑一冊我文柳世紀事蹟也舊本編錄太簡而無統紀今都有司寅鳳氏叅攷諸書凡於官職事行詩文遺墨可爲世法者一並收錄分門類聚頗爲詳密昭然可鑑盖用積年之工勞勩心力始成完本有如鄭之辭命必更四賢之手而成也吾門之有此人此事豈非幸歟若余者魯莽蔑劣不材不文猥忝副有司之任身親見之而顧以一語置諸卷末尤可幸也語云讀其書想見其人凡我諸宗讀是書而體祖先之心法惓惓服膺紹述其志事則先祖之靈豈不悅豫於冥冥之中乎相與勉勵焉寅鳳氏余偶同名而已孤不改殊甚未安茲并及之以俟覽者之辨云
庚子三月既望忠景公十七代孫寅鳳謹跋

永樂譜序

或曰文化柳氏後嗣之蕃左尹公救虎活命陰德使然也愚則以爲不然易曰積善之家必有餘慶其曰積者非一朝一事之謂也自古顯當世而享大名者非不多然其子孫繼繼綿綿不失家業以至數百年之久者鮮矣蓋我柳氏起於高麗之初至于明王朝始爲宰輔相襲箕裘以至于今垂五百年果未有久於此者也若論其派大提學寬與其都觀察使思訥同源於文簡也政丞亮則貞慎公之玄孫總制殷之則章景公之曾孫也其他同源分派從仕于朝者不可勝記我文化君乃文簡公之五代孫也傳于領義政廷顯以至都觀察使章八代連相益振家風可謂有餘慶矣是豈一朝之善乎而致此哉原其所由厥初大丞之傾財輔主文簡公之爲相廉謹是其權輿也及我文正誅除權臣復政王室膝行忠諫王妃免禍臨獄直言天官赧然認民爲隸者脫而爲良以銀爲賂者却而不受夫善莫大於忠也直也清也而公獨兼之若貞慎公之事親盡孝與夫章景公之剛毅文化君之正直則非一朝之善也後嗣之慶誠以此也余故曰非特左尹公一夢之驗也爲其後者追思積累之功常存戰兢之志考其功業而思欲繼述觀其節義而亦將無忝如是則餘慶固不止此耳此吾今日撰述之意觀者毋以誇世系爲訥永樂二十一年癸卯

我世宗五年

八月日大丞十四代孫前通政大夫承政院右代言

經筵叅贊官充春秋館編修官兼判司宰監事知禮曹事穎謹

誌

嘉靖譜序

程夫子曰管攝天下人心收宗族厚風俗須是明譜系然則譜系之明豈不關於尊祖重本之義耶同源分流人易世疎詠於陶詩情見於親親見於服發於蘇引余於是有感焉歲壬寅冬始修世譜廣採博訪以著年代尙多闕漏尋遷驪馬繼授義興困於叢簿亦未卒事乙巳之秋坐門禍配於聞詔義城縣名謫居蕭索伴愁無物日對譜圖專意証正而羈繫一隅無從質問間有往來使賓沿牒守宰或相過焉語必及於譜知其爲某之後某之孫也則因以求正其系派至於十八年之久問一證二舉五知十補漏者多而譜已成矣噫吾東方巨家大族內外門系無非大丞之遠派則子子孫孫顯揚於朝列者亦莫非大丞之餘蔭也修是譜而明是系豈特吾門之幸實朝廷管攝人心之一大本也柳承旨渾柳叅議潛聞是譜之撰欲鈐梓印播以壽其傳而柳相智善適

尹東都慶州相囑互議謀諸鄭方伯彥慤將欲分刊而遭甲寅之荒亦未遑也余懼夫十年之志終爲覆瓿之具而卒未得傳也手

自楷書以成二本一送柳叅議以爲他日繡梓之地一藏弊筭以爲我子孫之傳也鄭相宗榮是我從妹婿也觀風南道亦以紙筆求一本余不憚謄寫之勞而操筆益勤者期於廣傳而不至泯沒也嗚呼蘇老泉云觀吾譜者孝悌之心可以油然而生愚不知看此譜者獨無是心之發也耶嘉靖四十一年壬戌

我明宗十七年

十二月下浣謫人希潛書于聞韶寓舍

謹按公即左議政灌之猶子議政公破乙巳禍故公亦坐謫于襄城著此譜十卷

嘉靖譜跋

竊觀夫今世之人雖號爲厚門巨室尙不記高玄之名字者比比有之兄乃親盡服盡而至於雲仍之遠者乎是何秉彝之天終有所泯滅而然耶實以其世無家乘之相傳耳是以家君憤世俗之弊篤追孝之誠銳意修譜廣採博訪隨聞隨錄功既訖釐爲若干卷其間雖有甲乙之舛錯豕亥之誤訛亦可謂譜之大成者也惟我東國公卿士大夫之先祖後裔暨我王后妃嬪之世系靡不俱載則是豈特柳氏之私譜也歟其曰通國之公譜也亦不謬矣觀是譜者不但曰某也乃某也之先某也乃某也之後而已矣一開卷而如對祖先之面目天所賦之良心油然而露於念念之間而遠慕追敦之意自不能已已焉則譜之有補於世教也豈不偉歟况功業節義文章道德之可師可法者磊落相望然後之人聞其風而有聳慕興起有得於師法服膺之際而進退於光先輝後之域焉則其於作成人才之益夫豈少哉是誠我一家世守之青氈也其傳於無窮也固也嗚呼其盛矣乎前於歲在癸卯家君作宰龜城內外八寸之譜則刻於其邑以壽其傳而至於是譜也則編帙浩繁功未就緒而適丁外艱繼被門禍待罪南荒卅一年于茲矣千里謫中衣食之奉取資未遑則奚暇念及於此乎鄭相國彥慤之觀風南道也柳相國智善適尹東都相囑互議將欲開刊而遭甲寅之不稔事且未譜也今方伯李相國友閔亦大丞公之外裔也承命南來綜理之隙使閱是譜孝悌之心不能自己以爲不可使已成之譜湮沒而無傳遂走書於湖南南宮相國忱湖西柳相國潛則右二相國亦留意於此者得書而喜決計繡梓而繡梓之資無所取焉則一皆令諸大丞公之內外後裔在三道典專城之任鎮方面之位者不論其寸數之親疎族派之遠近各出供饋之費隨其郡縣之肥瘠而輕重焉聞風而樂赴者不知其幾人矣於是鳩集刻工開刊于聞韶月再閱而厥功告成焉吁文之有柳其所從來久矣自後梁末前朝初起家以來迄于今無慮七百餘年矣其子孫之姓姓不知

其幾千萬萬指而間有纂譜者蓋無幾焉至于家君沂流尋源而譜成焉則庸非天意之助而誰耶雖然天下之事無巨無細莫不待其人待其時而後行則一事之成一事之敗誠非偶然也其必有時有待可知也已若使家君不遇相國則譜爲束閣之空物而無以成其志廣其傳耳其何能自不朽乎然則家君積年用心之勤雖曰至矣盡矣而相國之爲家君地者固亦博矣其功之輕重大少宜如何言歟是故灑也竊自喜家君相國之相遇也於是忘其僭越溷弁諸卷端而有是言 皇明嘉靖紀元之四十四年龍集乙丑四月燈夕後二日男灑謹拜手稽首而跋

己巳譜序

譜系之修端爲尊宗法序昭穆別支庶而親親之情睦婣之義因此而生焉則蘇明允所謂觀吾之譜孝悌之心油然而生者豈不信然矣乎惟我文化柳氏起家八百年有奇其間修譜者只有數家一則永樂年間八座公穎著子姓譜一編一則嘉靖年間僉正公希潛著大譜十編蓋自永樂至嘉靖一百四十年自嘉靖至今一百有二十八年屢經兵燹存者無幾幾於泯沒無傳而人莫知先系之所自出後派之所由分則不待親盡服盡而爲路人矣不佞竊嘗慨然於斯有意重修而世遠人微見聞孤陋不敢妄試者月有年矣適吾宗人大司徒尙運氏深惟尊祖敬宗之義兼推保族修睦之道俾不佞撰修意甚盛也不佞不敢以老耄辭即據家傳姓譜旁求諸家譜牒參考證証正其訛誤編摩七載今幸粗完而自始祖以迄于今母論世代高下派系遠近各以行序彙錄於一部書宗支昭穆井井不紊父子也兄弟也有若居同一室灑藹勿穆則此譜之修奚但有補於後昆而止哉然其裒聚旣難用意勤勞而屨孫末裔萎靡淪落者或不無脫漏焉世系未澄襲謬仍循則不得不卞別焉後之觀者必有知我者矣嗚呼培根則枝茂濬源則流長理之常也大丞草昧際遇創基於初文簡輔相經綸趾美於後而誅除奸兇復政王室則有文正公清白自勵贊揚致治則有夏亭公至於文章政事黼黻王猷孝悌忠信經紀世道大書特書於家乘國史者前後相望則後裔之衍昌餘慶之隆溢何莫非祖先積德之所及也詩云無念爾祖聿修厥德凡我諸宗盍各勉旃噫陳世德述家風古人之所嘗惓惓者不佞於家譜序亦云爾 皇明嘉靖壬戌後一百二十八年己巳正月日大丞二十一代孫處厚拜手謹序

庚申譜序

梗槩以備吾宗僉君子之考閱焉

崇禎三乙酉季秋上浣大丞後孫左議政十三世孫達海謹序

丁巳譜序

世之以柳爲姓者無不鼻祖於大丞公皆貫文化至十世始分封文化則甲乙二派晉州全州瑞山善山四派則舛貫雖異而其本則同豐山柳氏出於襄毅公一派而其譜序曰樹州近於文化其同祖於大丞而分貫各鄉者蓋五派矣延安之車又祖於大丞以一人之孫同源異貫之裔繁昌振于永久實爲我東之大姓巨族而車柳同譜之譜回祿於神光其後有永樂譜一冊良度公穎之所修而不過子孫錄而已嘉靖譜十冊即松庵公猶子希潛之所修而尤詳於外裔各派卷帙稍多已巳譜五冊即處厚氏之所修而亦不過子孫錄且無生卒配墓卷帙比嘉靖譜半減庚申譜即我從祖叔父煥文甫所修而始合瑞善二派卷帙爲十三冊而以財力之不敷三冊未及刊行各派生卒配墓雖甚詳悉而成書則猶未也吾柳在麗朝有四世五公之稱自文簡公至文正公忠誠公貞慎公章景公詞翰之著于世忠盡之紀于朝有難勝記入我朝拜相爲七八如領議政廷顯忠景公亮皆吾十五代祖左議政公之同堂至親而始寧君堧老圃堂洵又皆左議政之後孫如夏亭公襄毅公松庵公德業忠節史不勝書輝曠百世如司藝公誠源祇候使西山公自潛亦皆左議政公之後孫而其他各派之軒冕相承節義顯世者難一二計則皇明于學士所謂東國之柳不下於晉之王謝唐之崔盧云者不亦宜乎庚申以後世疎人繁百世敦親之誼幾至於行路言宗之嘆惜慨恨者久矣癸丑冬余自河陽還纔數湖統禦使文植慨然以吾柳氏之無大譜爲恨勸余與副摠管匡國發文諸宗以爲修譜之道余不敢辭遂發文於八路矣至數載以歉荒未有應者粵丙辰春郡守詢亦勸余刊行通文雖庚申譜未及修單者並許錄入之意縷縷勸諭矣丁巳春嶺南宗人東範湖南宗人星緯海西宗人希宗甫諸人皆修單以來與京有司夏亭公派府使光國郡守詢詢之姪運弘檢漢城公派縣監明觀左議政公派丞旨師模忠景公派統禦使文植甫諸人相議定日始役幸賴八路諸宗同心合力庶幾有成書之幸是譜也即我得姓後初有之大譜也是豈恃人力之可及莫非先蔭攸暨豈不感哉蓋譜者譜其族也而先重敦睦之誼略附微婉之旨不計久速惟以成書爲期自發文至癸亥始刊行首尾十載頭鬚盡白余之精可謂盡在是矣後之繼爲此譜者果能知我罪我否也崇禎紀元後三癸亥三月日大丞公二十八世孫通訓大夫加平郡守秉均謹序

同姓同譜是知百世敦親之義則豈宜以世疎族繁分派爲異譜也哉然而我柳之得姓蓋千有餘年歷世亦三十有奇年代久遠雲仍昌衍爲東方盛族在昔永樂之世始有我譜五轉至丁巳譜而子姓尤極盛矣上稽先系所自出下究後裔所由分則同源分流不知其幾千百派系是以譜牒愈往愈繁卷帙之多殆至於充棟盈宇而我先祖忠景公派各派中最巨派也昔之入錄於譜者今之生存於世者厥數以萬萬計幾居譜冊之半焉若復世益降年益久則後生蕃殖必倍蓰于今日後之修譜者雖欲合譜其可得乎余以先事之慮就我忠景公派分以貳之作爲一譜如南陽洪氏平山申氏派譜之例又分我典祀令公兄弟四派序次爲各卷便是子孫錄也而且其印布周博考閱簡便反復勝於大譜之浩繁編帙且小庶可以家藏而戶置斯豈非吾族之私幸歟然大譜各派莫非我同姓之親而后屬疎遠遽分爲各譜親親敦睦之義顧安在哉余於是竊有憾焉至於庚申丁巳譜追入之派其世系來歷間有未瑩譜法是嚴固常痛加辨別第辱孫末裔萎靡淪落者或不無漏於前而入於后則大譜之前所追錄者豈盡是非吾同派也哉譜牒存拔事係難慎顧余茫昧雖不敢妄自筆削至如襲謬冒錄的知其無疑則不得不擯不與之譜未知覽是譜者果能知我罪我否耶

崇禎紀元后三丁亥十一月日忠景公十五代孫宏謹序

甲子譜序

竊念我文城之柳最著於東方受氏之族其源出自軒轅姬氏自軒轅至崇伯四世而傳于姒氏姒氏十世而傳于王氏王氏相系五十七世而傳于車氏車氏相系三十二世而傳于柳氏貫於儒州五世大丞公草昧際遇創基於初爲文柳之鼻祖文簡公輔相經綸趾美於后而誅除姦兇復政王室有文正公開學闢異贊揚致治有夏亭公誠正格致開誨后學有四矯公黼黻王猷經紀世道有忠簡公居家孝友在官廉白有灌隱公十典州郡清白慈惠有原州公高明之學剛直之性有清溪公孝施於家忠著于邦有鶴巖公淵識偉度立經正紀有荷潭公斯文不喪世道有賴有礪溪公位至卿月恪勤守職有文平君開拓土地樹勳百世有崑山君強毅自持正直自守有章景公大義堂堂捧日之忠有司藝公軒冕盈門烜赫當世有文寧君鴨江回軍開

國元勳有左相公叩馬之節蹈海之志有西山公才學出人風雲有會老圃堂猷爲建白規切箴益有始寧府院君直言極諫
進修楷範有醒齋公樹勳於國殫誠於先有文陽君道得其傳見許先正有眉巖公大慮遠謨剛德克就有貞肅公竭忠王事哭
請天兵有文興君德崇業廣翊戴忠勳有忠景公忠炳日月百世風節有松庵公此皆最顯其餘各派軒冕相望 我朝以來九
登鼎席十三元勳文蔭武登仕籍生進者三千七百餘人忠孝廉白節義德行文章難百數計則 皇明于學士所謂東國之柳
不下於晉之王謝唐之崔盧云者不亦宜乎柳氏之族於斯爲盛蔚然爲衣冠巨族則其不可無譜審矣永樂二十一年癸卯良
度公始修世譜只錄名諱爲一卷癸卯后一百三十九年嘉靖四十一年壬戌僉正公修十卷內外族戚一一備載寔爲通國之
正書壬戌後一百二十八年己巳處厚氏修五卷爲一宗之公筆己巳后五十一年庚申煥文氏修譜十卷未了而達海氏續補
爲十三卷庚申后五十七年丁己白川公修二十七卷而今年甲子丁巳后六十八年也近因篇帙之浩繁各修派譜丁亥進士
公法氏始修忠景公派譜庚寅僉樞學勉氏修左相公派譜辛卯漢永氏修檢漢城公派譜丙午相斗氏修崑山君派譜辛卯和
用氏修祇侯使公派譜壬戌秉喆氏繼修左相公派譜噫各派小譜雖緣事力之不得已然一室之內過於分異各祖其祖各親
其親孝悌之心敦睦之誼止於同派則吾 先祖均視之誼掃地盡矣何如其可也余用齋恨者久矣而有意於合譜搜羅舊牒
辨其昭穆宗支之序所居之地清濁之分瞭然於心目者蓋有年矣乃於壬戌之冬與承旨興吉氏正言泰鉉氏防禦使映氏商
確收議一邊發簡一邊鍍梓二周歲而功已告矣是役也秉喆氏筆削而校讎及第元基監印永源秉旹主管而證正燦基弘基
泰赫文赫輪回而通告寅植根逸書寫而監董證其古今斥其濫冒譜例一依嘉己兩書因遵一書之通八域響應幅湊并臻不
遠千里宗吾中尊祖敦親之誠於斯焉可見而亦關於 聖世之風化矣猗歟盛哉惟我 聖上在上以敦親之誼設璿派譜於
宗親府累降飭 敎使遠近無所一漏大哉 聖德也推此敢言吾柳之稱托不入者非但宗中之圯族實爲 聖世之悖類敢
不懼哉敢不戒哉書旣成記其顛末弁卷之首云

崇禎二百三十七年 聖上即位元年上元甲子上元日 大丞公二十八世孫昇基謹記

丙寅譜序

在易同人之辭曰同人于宗夫子繫之以象曰類族辨物同入之道也生入之道在於人與人同而尤不可以不同者宗族是已今欲同吾宗族必先溯其本源達其支流得以繼序有統親疎有倫然後乃可同之然則辨以類之是譜之道也我柳之籍文城其系遠矣至麗朝大丞公大著名碩世作磊落相望封君有六曰文山曰瑞寧曰崑山曰文平曰全城曰晋山又有四世五公相繼彪炳大鳴國家之盛曰文簡文正貞慎章景溫靖即其諡也厥後子孫益大而熾派分支別殆遍一國而世代寢邈宗族之親者日疎而疎至於路人此吾譜之所以不可不修也是以自永樂嘉靖至己庚丁甲凡六割隴而後因事力之不逮各修其派別立門戶不過爲小宗譜而非可曰大同之譜也恐有所違祖宗均視之義既以前後設大同之役者屢矣亦不免有始而無卒仁峴松峴之設已矣無可論高山基益氏庚子之設身歿未畢典洞興弼氏丁未之設世亂而止竟不得就吾宗所以茹恨者久矣癸亥春鎮川宗人寅德明烈甫袖基昌基殷兩氏書而至諗于余曰吾譜之闕而未修今己一周甲矣盍相與勉力而從事於此余乃竦爾而作曰諸顧以未死餘喘凡於一切世務雖不敢與聞於其間譜吾家事也不可辭以自廢安敢不力朱子曰先祖有善不知不明不明不仁程子曰管攝天下人心收宗族厚風俗須是明譜系譜之所繫其重且大如此余雖衰疾安可不助其萬一乃於是年五月發文遍告八方諸宗諸宗歛然響應贊成是役其凡例規則一遵舊制其他參酌存刪務盡精覈凡四閱歲而成總若干卷於是乎本源之所自出支流之所由分開卷瞭然而凡吾宗族無有疎戚遠近而彙全一譜庶不失大易全入之道而有合乎祖宗均視之仁也且前後屢設屢撤之役今焉乃就乃知凡事之成自有其日而吾宗之嘗所茹恨者從亦可以無憾矣譜中諸公之德業文章與夫危忠卓節讜言嘉謨撮其梗槩約爲一卷名曰文獻錄以付譜卷之後嗚呼使夫爲諸公後者覽是而惕然興感相與勗勵思所以繼述先美則庶有光於斯譜也歟 柔兆攝提格重陽越三日大丞公三十一世孫通政大夫秘書院丞兼掌禮院掌禮寅哲謹序

跋

水有百川四瀆之流而尋其初則一源也木有千枝萬葉之分而求其本則一根也吾柳之於大丞公如水之源木之根源既遠而流長根既固而枝繁子姓之蕃衍遍乎一國溯之以上昭載乎得姓之初推之以下不紊乎分派之後莫譜若也吾譜之始自

永樂癸卯至 高宗甲子凡六次大修自甲子以後逮于今一甲有奇屢始而未終宗人之長子生孫無以譜焉用是齎恨者久矣癸亥春自鎮川宗中某某氏勇決先倡鳩財設廳八域諸宗隨以協誠贊助未四載而竣功乃知一事之成亦自有時然不有先靈默佑果能如是迅速也哉其始設也門中長老俾不佞叅校編摩顧昧譜學毫無所補而第其凡例節次遵守舊規參酌時勢或略而不書且因晚單以爲續補彙錄事實文獻附之總目編成六十冊子猗歟盛矣昔范祖禹有言曰欲學堯舜先法其祖凡我同譜之人追源返本體我祖先之積累而惇行孝悌則何患不到聖賢地位而餘慶之無窮將有望於來許也其各勉旃哉是役也明烈甫經紀之力尤多茲書於此以表其誠心云爾 大丞公三十一世孫幼學寅鎬謹跋

甲戌略譜序

我文柳大同之役凡七剗剗而惟內寅譜失於篇帙之浩大其冗費不些價文太多派派不能奉安人人亦未敬覽因有輕易便覽之志者衆多矣于斯時也寅性志善勇起首倡發通八域以秋荒之致旋即中止暢淳氏與東植繼以踵至發送各道有司搜單合譜校讐纔畢癸臘八日校正寅鎬身先逝世悲夫痛矣執紼而哭絮酒而誄已矣歿焉望廬刊役不啻難便事體所在不可因循移轉于掌財暢淳冢家在汽車驛前諸宗之交通甚便易也副有司興翊氏時或來而即還副校正芝赫氏遭內艱居廬不進不佞於是役辭免不得向耄之年衰頹多病委在床褥茲任之以在座僉員未知編樣之如何噫省繁就簡編成三冊懷中可容掌上可運始於壬申春終於甲戌夏以陳世德以述家風敦宗之義裕後之謨俱載于此孰不敬也豈敢忽乎勗哉勉哉 太師三十一世孫秘書院丞寅哲謹述

跋

此譜略之以細小字續修者若厭其丙譜浩大之所由也竊嘗觀永樂譜良度公所著只錄名諱爲一卷嘉靖譜僉正公所著丙外族戚一一備載爲十卷己巳譜處厚氏所著以大公直筆刪其繁文爲五卷庚申譜煥文氏所著爲十卷未了而乙酉達海氏續補爲十三卷丁巳譜白川公所著隨其入單爲二十五卷甲子譜昇基氏所著爲三十七卷丙寅譜承旨寅哲氏所著爲五十三卷而雲仍繁衍篇帙漸多喜莫盛矣但財力不贍未得奉安者惟多亦有餘憾也今此壬申春一書之發八域響應輻湊并臻

有收單而親傳者或有搜單而付郵者名單盈箱溢案校讐纒畢校正寅鑄氏不幸逝世此將奈何百爾思量莫知攸爲余自擔
奔斯役諸單與什物輸來于此始於猪山終於內秀這間努力果何如哉是役也秉天氏與基洵晟永寅暉寅鶴章烈輪回而通
告憲烈桂重溶根在昌在淳合單而正書昌永寅性監印而考訂寅肅根辭贊成而監董東植舜杰主管而整正余以庸陋猥叅
是役詳知顛末故忘其僭越書于卷端俾覽者乃知今日之勞苦云 太師二十九世孫暢淳謹跋

派譜序

呂東萊曰古之氏族繁而知之者反多今之氏族簡而知之者反少蓋由譜牒之明興廢而已以是知譜牒之學不可不講也吾
柳之譜始於永樂至于丙寅凡七回修成又有甲戌畧譜彙有詳略疎漏之異各隨其人時義之如何無容贅論惟我忠景公派
爲文柳之最蕃在昔 純廟丁亥進士公宏氏單修派譜今爲百三十有四年矣新經大亂之餘南北未一大同合修誠難擬議
姑以紹述丁亥之事詢謀歸結以余不佞忝在都有司之席俾主其役辭非其人而不獲乃於戊戌春憊得湖西之大德郡鎮岑
鷄籠山下縣監公齋舍而設廳蓋取諸宗往來之便宜也不佞時居江陵不遠千里車路往返收聚宗單至昨年臘月書譜畢其
義例大抵仍舊而間有事蹟官職之爽實者叅照國朝實錄及大典而釐正之顧此蔑識妄犯手勢僭踰極矣校書之難如掃落
葉則安保其無踈漏處耶因就江陵之印刷所而印出蓋與不佞同鄉顏情之熟而操縱之隨意也譜旣成告于諸宗氏曰天下
之事本無獨成之理則此役之成實由於諸宗之齊誠合力若其施措之宜則活字之細密役員之簡少用度之節約而一帙六
册之價不過五斗米價可以家奉而人講此則不佞主旨之所在諸宗之所贊者也嗚乎朱子不云乎祖先有善而不知不明知
而不傳不仁苟譜學之講則豈有不明不仁之罪哉願諸宗勉之哉 隆熙庚戌後五十一年 庚子三月上巳 大丞公後忠
景公十七代孫寅鳳謹序